



PREDGOVOR

Islamski pedagoški fakultet u Zenici obilježava ove godine značajan jubilej - 15 godina postojanja. Sad već davne, ratne, 1993. godine, grupa svjesnih Bošnjaka muslimana odlučila je adekvatno odgovoriti novonastaloj situaciji u bosanskohercegovačkom društvu. Osnovana je Islamska pedagoška akademija, čiji je cilj odgajanje i obrazovanje stručnog kadra za predmet islamske vjeronauke u državnim školama. Početak je bio težak i mukotrpan, ali zahvaljujući upornosti ljudi koji su imali jasnu viziju i jaku volju, projekat Fakulteta je uspješno, i ubrzanim koracima, koračao naprijed. Na osnovu dosadašnjih rezultata rada, Islamski pedagoški fakultet u Zenici pokazao je da se radi o uspješnom kolektivu i respektabilnoj instituciji koja zauzima značajno mjesto u akademskoj javnosti, odnosno instituciji koja svojim studentima nudi kvalitetnu edukaciju, a time i profesionalni angažman na prostorima Bosne i Hercegovine i šire. Ove godine IPF obilježava petnaest godina svog uspješnog rada. Taj je period dovoljan da se i ovim povodom osvrnemo na dosadašnji rad.

Ove godine promovisali smo 9. generaciju diplomiranih nastavnika i 3. generaciju diplomiranih profesora islamske vjeronauke odškolovanih na Islamskom pedagoškom fakultetu u Zenici. Do sada je, zajedno sa ovom generacijom, na našem fakultetu diplomiralo 403 nastavnika i 131 profesor islamske vjeronauke.

Ponosno ističem da smo ove godine promovirali drugu generaciju profesora islamske vjeronauke koja je studirala po bolonjskom principu visokog obrazovanja, te značajno povećala prosjek prolaznosti i procenat studenata koji studij završavaju u prvom junskom roku. Nadam se da će novi način edukacije nastavničkog kadra doprinijeti kvalitetu nastave islamske vjeronauke, te uticati na poboljšanje sistema obrazovanja u našoj državi i poboljšati odgojnu komponentu u obrazovanju, koja je gorući problem savremenog društva.

Pored Odsjeka za islamsku vjeronauku, na našem fakultetu studira četvrta generacija budućih socijalnih pedagoga na Odsjeku za socijalnu pedagogiju, a ove godine upisana je i prva generacija na Odsjeku za predškolski odgoj.

Islamski pedagoški fakultet posebno bilježi zapažene rezultate na polju stručnog unapređivanja i usavršavanja kadra, jer svake godine neko od uposlenih magistrira ili doktorira.

Svi ovi rezultati nas obavezuju na veći i usredsređeniji angažman u budućem razvoju Fakulteta. Pred nama je, već sada, nekoliko važnih projekata koji čekaju da se realiziraju:

Zaokruživanje procesa studiranja po bolonjskim standardima i okončanje priprema za eksternu evaluaciju Fakulteta. Pokretanje tzv. master studija na Odsjeku za islamsku vjeronauku i na Odsjeku za socijalnu pedagogiju. Organiziranje treće međunarodne konferencije pod naslovom "Sistem preveniranja socijalnog isključivanja mladih". Izrada elaborata za nove odsjeke i pojačan angažman na polju naučnoistraživačkog rada.

Od samoga početka rada Fakulteta dali smo akcent na aplikativnom islamu, stoga je naš moto spajanje univerzalnih vrijednosti vjere sa novim dostignućima savremene nauke, pozitivnih tokova tradicije sa zahtjevima vremena, a to jeste formula uspjeha. Radovi naših profesora i saradnika u ovom broju zbornika potvrđuju naš moto, te ga sa zadovoljstvom preporučujem svima onima koji tragaju za korisnim znanjem.

Prof. dr. sc. Zuhdija Adilović
dekan Islamskog pedagoškog fakulteta u Zenici